

四庫全書

史部

欽定四庫全書

唐會要卷八十八

宋 王溥 撰

鹽鐵

開元元年十二月河中尹姜師度以安邑鹽池漸涸開拓疏決水道置為鹽屯公私大收其利其年十一月五日右拾遺劉彤論鹽鐵上表曰臣聞漢孝武為政廩馬三十萬後宮數萬人外討不庭內興宮室殫費之甚實

百當今然而古費多而貨有餘今用少而財不足者何
豈非古取山澤而今取貧人哉取山澤則公利厚而人
歸於農取貧人則公利薄而人去其業故先王之法也
山海有官虞衡有職輕重有術禁法有時一則專農二
則饒國濟人盛事也臣實為當今疑之夫煮海為鹽採
山鑄錢伐木為室豐餘之輩也寒而無衣饑而無食傭
賃自資者窮苦之流也若能收山海厚利奪豐餘之人
蠲調斂重徭免窮苦之子所謂損有餘而益不足帝王

之道可不謂然乎故臣願陛下詔鹽鐵木等官各收其
利貿遷於人則不及數年府有餘儲矣然後下寬貸之
令蠲窮獨之徭可以惠羣生可以柔荒服雖戎狄降附
堯湯水旱無足虞也奉天適變惟在陛下行之上令宰
臣議其可否咸以鹽鐵之利甚益國用遂令將作大匠
姜師度戶部侍郎強循俱攝御史中丞與諸道按察使
檢校海內鹽鐵之課至十年八月十日勅諸州所造鹽
鐵每年合有官課比令使人勾當除此更無別求在外

不細委知如聞稍有侵尅宣令本州刺史上佐一人檢校依令式收稅如有落帳欺沒仍委按察糾覺奏聞其姜師度除蒲州鹽池以外自餘更不須巡檢

貞元十六年十二月史牟奏澤潞鄭等州多食私鹽請一切禁斷從之二十一年二月停鹽鐵使月進舊錢總悉入正庫以助經費而主此務者稍以市諸珍玩時新物充進獻以求恩澤其後益甚歲進錢物謂之羨餘而經入益少及貞元末遂月獻焉謂之月進及是而罷

元和二年九月給事中穆贇請州府鹽鐵巡院應決私鹽死囚請州縣同監免有冤濫從之

其年十二月御史中丞李夷簡奏諸州使有兩稅外雜權科歛違勅不法事請諸道鹽鐵轉運度支巡院察訪狀報臺司以憑聞奏從之

五年正月度支奏鄜州邠州涇原諸將士請同當處百姓例食烏白兩池鹽六年閏十二月戶部侍郎判度支盧坦奏河中兩池課鹽勅文祇許於京畿鳳翔陝虢河

中澤潞河南許鄭等二十五州界內糴貨比來因循兼
越興元府及洋州興鳳文成等六州臣移牒勘責得山
南西道觀察使報其果閬兩鹽本土戶人及巴南諸郡
市糴又供營軍士馬尚有懸欠若兼數州自然闕絕又
得興元府諸耆老狀申訴臣今商量河中鹽請放入六
州界糴貨從之

十年七月度支皇甫鏞奏加陝西內四監劔南東西兩
川山南西道鹽估以利供軍從之

十三年鹽鐵使程异奏應諸州府先請置茶鹽店收稅
狀準今年正月一日赦文其諸州府因用兵以來或慮
有權置職名及擅加科配事非常制一切禁斷者伏以
權稅茶鹽本資財賦贍濟軍鎮蓋是從權兵罷自合便
停事久實為重斂其諸道先所置店及收諸色錢物等
雖非擅加有異常制伏請准赦文勒停從之

十四年三月鄆青兗三州各置權鹽院十五年閏正月
鹽鐵使柳公綽奏當使諸鹽院場官及專知納拾并吏

人等有罪犯合結罪者比來推問祇罪本犯所由其監臨主守都無科處伏請從今後舉名例律每有官吏犯賊監臨主守同罪及不能覺察者並請准條科處所冀貪吏革心從之其年九月改河北稅鹽使為權鹽使

長慶元年三月勅河朔初平人希德澤且務寬大使之獲安其河北權鹽法宜權停仍令度支與鎮冀魏博等道節度審量如能約計縑利錢數都收管每年據數付權鹽院亦在穩便自天寶末兵興以來河北鹽法羈縻

而已暨元和中准皇甫鎛奏置稅鹽院同江淮兩池權
利人苦犯禁當鎮亦頻上訴故有是命其月鹽鐵使王
播奏揚州白沙兩處納權場請依舊為院又奏請鹽院
糶鹽付商人請每斗加五十通舊三百文價諸處煎鹽
場停置小舖糶鹽每斗加二十文通舊一百九十文價
又奏應管煎鹽戶及鹽商并諸鹽院停場官吏所由等
前後制勅除兩稅外不許差役追擾如諸吏有違越者
縣令奏聞貶黜刺史罰一季俸錢再犯者奏聽進止並

從之二年三月王播為淮南節度使兼領鹽鐵轉運播請攜鹽鐵印赴鎮上都院請別給賜從之其年五月勅兵革初寧實資筦榷閭閻重困則在蠲除如聞淄青兗鄆三道往年糶鹽價錢近收七十萬貫軍資給費優贍有餘自鹽鐵使收管已來軍府頓絕其利遂使經行陳者有停糧之怨服隴畝者興加稅之嗟雖官受利而郡益空若人獲安寧我能節用鹽鐵使先於淄青兗鄆等道管內置小鋪糶鹽及巡院納榷起長慶二年五月一

日以後一切並停仍委薛革馬總曹華約比年節度使自收管充軍府州縣逐急用度支仍均減管內貧下百姓兩稅錢數兼委節度觀察使至年終以來各具糶所得錢并減放貧下稅數聞奏四年五月勅東都江陵鹽鐵轉運留後並改為知院者從鹽鐵使王涯請也

太和二年七月勅潼關以東度支分巡院宜併入鹽鐵江淮河陰留後院

開成元年閏五月七日鹽鐵使奏應犯鹽人準貞元十

九年太和四年已前勅條一石已上者止於決脊杖二十徵納罰錢至於太和四年八月二十已後前鹽鐵使奏二石已上者所犯人處死其居停并將船容載以及拒捕等人並準犯鹽條處分近日科決殺人轉多權課不加舊今謂却依貞元舊條其犯鹽一石已上至一石者請決脊杖二十補充當據捉鹽所由待捉得犯鹽人日放如犯三石已上者即是囊橐奸人背違法禁請決訖待瘡損錮身牒送西北邊諸州府効力仍每季多具

人數及所配去處申奏挾持軍器與所由捍敵方就擒者即請準舊條同光火賊例處分從之二年十月勅鹽鐵戶部度支三使下監院官皆卽官御史為之使雖更改官不得陵替如顯有曠敗卽具事以聞

五年九月勅稅茶法起來年却付鹽鐵使管

權酤

貞元二年十二月度支奏請於京城及畿縣行權酒之法每斗權酒錢百五十文其酒戶與免雜差役從之

元和六年京兆府奏權酒錢除出正酒戶外一切隨兩稅青苗錢據貫均率從之十二年四月十二日戶部奏準勅文如酤戶出權酒錢處即不得更置官店權酤其中或恐諸州府先有不酤戶出錢者即須權酤請委州府長官據錢額約米麴時價收利應額足即上仍限起酤到後一月商量處分至十四年五月湖州刺史李應奏先是官中酤酒代百姓納權歲月既久為弊滋深伏望許令百姓自酤取舊額仍許入兩稅隨貫均出依舊

例抑納輕貨送上都許之

太和八年二月九日勅節文京邑之內本無酤榷自貞元用兵之後費用稍廣始定戶店等第令其納榷殊非為民今後特宜停廢

會昌六年九月勅揚州等八道州置榷麴并置官店酤酒代百姓納榷酒錢并充資助軍用各有榷許限揚州陳許汴州襄州河東五處榷麴浙西浙東鄂岳三處置官店酤酒如聞禁止私酤過於嚴酷一人違犯連累數

家閭里之間不免咨怨宜從今已後如果有人私酤酒及置私麴者但許罪止一身并所由容縱任據罪處分鄉井之內如不知情並不得追擾

鹽池使

景雲四年三月九日始置關內鹽池使先天二年九月強循除幽州刺史充鹽池使此池即鹽州池也

開元十五年五月兵部尚書蕭嵩除關內鹽池使自是朔方節度常帶鹽池使

鹽鐵使

乾元元年度支郎中第五琦充諸道鹽鐵使上元元年
五月戶部侍郎劉晏充鹽鐵使元年建子月戶部侍郎
元載充鹽鐵使廣德二年戶部侍郎第五琦充諸道鹽
鐵使永泰元年正月劉晏充東都淮南浙江東西湖南
山南東道鹽鐵使第五琦充京畿關內河東劔南山南
西道鹽鐵使大厯四年三月劉晏除吏部尚書充東都
江南淮東道鹽鐵使五年三月二十六日停建中三年

十二月二十日包佶充汴東鹽鐵使崔縱充汴西鹽鐵使

貞元二年十二月尚書左僕射韓滉加諸道鹽鐵使五年二月中書侍郎竇參充諸道鹽鐵使八年三月戶部侍郎張滂充諸道鹽鐵使十年十月潤州刺史王緯充諸道鹽鐵使十五年以浙西觀察使李錡充諸道鹽鐵使永貞元年以司空平章事杜佑兼諸道鹽鐵使元和元年四月兵部侍郎李巽充諸道鹽鐵使三年六月刑

部尚書李鄴充諸道鹽鐵使五年十二月盧坦除刑部
侍郎充諸道鹽鐵使六年四月刑部侍郎王播充諸道
鹽鐵使十四年五月刑部侍郎柳公綽充諸道鹽鐵使
長慶元年二月王播復為刑部尚書諸道鹽鐵使四年
四月王涯除戶部侍郎諸道鹽鐵使寶曆元年王播復
以節度使充諸道鹽鐵使太和九年十一月右僕射令
狐楚充諸道鹽鐵使開成元年戶部尚書李石充諸道
鹽鐵使三年十月楊嗣復為戶部尚書充諸道鹽鐵使

五年二月戶部尚書崔珙充諸道鹽鐵使會昌元年七月左僕射平章事杜悰充諸道鹽鐵使六年四月以大理卿馬植為刑部侍郎諸道鹽鐵使大中五年刑部侍郎裴休充諸道鹽鐵使十二年兵部侍郎柳仲郢充諸道鹽鐵使十二年二月戶部侍郎夏侯孜充諸道鹽鐵使十四年右僕射杜悰復充諸道鹽鐵使咸通五年十一月戶部侍郎劉鄴充諸道鹽鐵使六年十月兵部侍郎于琮充諸道鹽鐵使

乾符元年二月崔彥昭為兵部侍郎充諸道鹽鐵使其
年又以兵部侍郎王凝充諸道鹽鐵使二年二月兵部
侍郎裴坦充諸道鹽鐵使四年六月宣歙觀察使高駢
為潤州刺史諸道鹽鐵使六年移節淮南領使如故中
和元年兵部侍郎蕭遘充諸道鹽鐵使其年中書侍郎
平章事韋昭度充諸道鹽鐵使光啟二年三月刑部尚
書孔緯充諸道鹽鐵使

大順二年門下侍郎杜讓能充諸道鹽鐵使景福二年

十一月吏部尚書平章事崔昭緯充諸道鹽鐵使

乾元二年京兆尹嗣薛王知柔為戶部尚書諸道鹽鐵使其年九月門下侍郎平章事徐彥若充諸道鹽鐵使光化三年八月左僕射平章事崔胤充諸道鹽鐵使天祐元年左僕射裴樞充諸道鹽鐵使其年門下侍郎平章事柳璨充諸道鹽鐵使

安邑解縣兩池置權鹽使一員推官一員巡官六員安邑院官一員解縣院官一員胥吏七十人防池官健及

池戶二百八十人先是兩池鹽務隸度支貞元十六年
史牟以金部郎中主池務遂奏置使額至二十一年鹽
鐵度支合為一使以杜佑兼領佑以度支既稱使其所
管不宜更有使名遂與東渭橋使同奏罷之至元和三
年七月判度支裴垕以兩池職轉繁劇復以留後為權
鹽鐵使

鹽州境有五池而以烏池所產為最置權稅使一員權
官一員巡官兩員胥吏一百三十人防池官健及池戶

四百四十人

溫池置權稅使一員權官兩員巡官兩員胥吏三十九人防池官健及池戶百六十五戶大中四年三月因收復河隴勅令度支收管其鹽仍差靈州分巡院官專勾當至六年勅隸威州以新制置未立課額

和落池在河東豐州界隸河東供軍使每年鹽採至一萬四千餘石振武天德兩軍及營田水運官健自大中四年党項羌叛擾饋運不通供軍使請權市河東白

池鹽供食其白池屬河東節度使不繫度支

長慶元年三月勅烏池每年糶鹽收博權米以一十五萬石為定額太和二年三月度支奏京兆府奉化縣界鹵池側近百姓取水栢柴燒灰煎鹽每石灰得一十二斤一兩亂法甚於鹹土請行禁絕今後犯據灰計鹽一如兩池鹽法條例科斷從之

三年四月勅安邑解縣兩池權課以實錢一百萬貫為定額至大中元年正月勅但取足段精好不必計舊額

錢數及大中六年度支收權利一百二十一萬五千餘貫安邑池鹽在解縣朝邑小池在同州鹵池在京兆府奉化縣並禁斷不權

義倉及常平倉

武德元年九月四日置社倉其月二十二日詔曰特建農圃用督耕耘思俾齊民既庶且富鍾庾之量異同水火宜置常平倉監官以均天下之貨市肆騰踊則減價而出田穡豐美則增價而收庶公私俱濟家給人足抑

止兼并宣通擁滯至五年十二月廢常平監官

貞觀二年四月三日尚書左丞戴胄上言曰水旱凶災
前聖之所不免國無九年儲蓄禮經之所明戒今喪亂
之後戶口凋殘每歲納租未實倉廩隨即出給纔供常
年若有凶災將何賑恤故隋開皇立制天下之人節級輸
粟多為社倉終文皇一代得無饑饉及大業年中國用
不足並取社倉之物以充官費故至末塗無以支給今
請自王公已下爰及衆庶計所墾田稼穡頃畝每至秋

熟準其見在苗以理勸課盡令出粟麥稻之鄉亦同此
稅所在立為義倉年穀不登百姓饑饉當所州縣隨即
取給則有無均平常免匱竭上曰既為百姓先作儲貯
官為舉掌以備凶年非朕所須橫生賦斂利人之事深
是可嘉宜下有司議立條制戶部尚書韓仲良奏王公
已下墾田畝納二升其粟麥稻之屬各依土地貯之州
縣以備凶年制可之

十三年十二月十四日詔於洛相函徐齊并秦蒲等州

置常平倉

永徽二年閏九月六日勅義倉據地收稅實是勞頓宜令率戶出粟上下戶五石餘各有差六年八月二十九日京東西二市置常平倉

顯慶二年十二月三日京常平倉置常平署官員

咸亨元年閏九月六日置河陽倉隸司農寺三年六月十七日於洛州栢崖置教倉容二十萬石至開元十年九月十一日廢

開元二年九月二十五日勅天下諸州今年稍熟穀價全賤或慮傷農常平之法行之自古宜令諸州加時價三錢糴不得抑斂仍交相付領勿許懸久蠶麥時熟穀米必貴即令減價出糴豆穀等堪貯者熟亦準此以時出入務在利人其常平所須錢物宜令所司支料奏聞

四年五月二十一日詔州縣義倉本備飢年賑給近年以來每三年一度以百姓義倉糴米遠送京納仍勒百

姓私出脚錢自今以後更不得以義倉變造

七年六月二十八日勅關內隴右河南河北五道及荆揚襄夔益彭蜀漢劍茂等州並置常平倉其本上州三千貫中州二千貫下州一千貫每糴其本利與止倉帳同申十年九月十五日廢河陽栢崖坦縣等倉十六年十月二日勅自今歲普熟穀價至賤必恐傷農加錢收糴以實倉廩縱逢水旱不慮阻饑公私之間或亦為便宜令所在以常平本錢及當處物各於時價上量加

三錢百姓有糴易者收糴事須兩和不得限數配糴訖其所用錢物及所收糴得物數具申所司仍令上佐一人專勾當

二十二年八月九日勅應給貨糧令錄奏勅到三口以下給米一石六口以下給兩石七口以下給三石如給粟準米計折

二十八年正月勅諸州水旱比待奏報然後賑給道路恐遠往復淹遲宜令給訖奏聞

天寶六載三月二十二日太府少卿張瑄奏準四年五月八日并五年五月十六日勅節文至貴時賤價出糶賤時加價收糶若百姓未辦錢物者任準開元二十年七月九日勅量事賒糶至粟麥熟時徵納臣使司商量且糶舊糶不全別用其賒糶者至納錢日若粟麥雜種等時價甚賤恐更廻易艱辛請加價便與折納

廣德二年正月二十五日第五琦奏每州置常平倉及庫使司商量置本錢隨當處米物時價賤則加價收糶

貴則減價糶賣

建中元年七月勅夫常平者常使穀價如一大豐不為之減大儉不為之加雖遇灾荒人無菜色自今已後或米價貴時宜量出官米十萬石麥十萬石每日量付兩市行人下價糶貨三年九月戶部侍郎趙贊上言曰伏以舊制置倉儲粟名曰常平軍興以來此事寢廢因循未齊垂三十年其間或因凶荒流散餒死相食者不可勝紀古者平準之法使萬室之邑必有萬鍾之藏春以奉

耕夏以奉耘雖有大賈富家不得豪奪吾人者蓋謂能
行輕重之法也自陛下登極以來許京城兩市置常平
官糴鹽米雖經頻年少雨米價騰貴此乃即日明驗實
要推而廣之當軍興之時與承平時或異自須兼儲布
帛以備時須臣今商量請於兩都并江陵成都揚汴蘄
洪等州府各置常平輕重本錢上至百萬貫下至數十
萬貫隨其所宜量定多少唯貯斛斗足段絲麻等候物
貴減價出賣物賤加價收糴權其輕重以利罷人從之

贊於是條奏諸道津要都會之所皆置吏閱人財貨計錢每貫稅二十文天下所出竹木茶漆皆十一稅之以充常平本時國用稍廣常賦不足所稅亦隨時而盡終不能為常平本

貞元八年十月勅諸軍鎮和糴貯備共五十三萬石本價之外更量與優饒其粟麻據米數準折虛價直委度支以停減江淮運腳錢充並支綾絹絕縣勿令折估其所糴粟等委本道節度使監軍同勾當別貯非承特詔不

得給用

十四年六月詔以米價稍貴令度支出官米十萬石於兩街賤糶其月以久旱穀貴人流出太倉粟量給京畿諸縣其年七月詔賑給畿京麥種三萬石其年九月以歲饑出太倉粟三十萬出糶其年十二月以河南府穀貴人流令以含嘉倉七萬石出糶

十五年二月以久旱歲饑出太倉粟十八萬石於諸縣賤糶

十九年十月司農奏請依六典置太倉令兩員丞六員
監事十員支計官驅使官三人典一人府史六人從之
元和元年正月制歲時有豐歉穀價有重輕將脩水旱
之虞在權聚歛之術應天下州府每年所稅斛斗以時
糴糴務在救乏賑貸所宜速須聞奏

六年二月制如聞京畿之內舊穀已盡宿麥未登宜以
常平義倉粟二十四萬石貸借百姓諸道州府有乏少
糧種處亦委所在官長用常平義倉米借貸淮南浙西

宣歙等道元和二年四月賑貸並宜停徵客至豐年然後徵納其年八月司農少卿崔鄩奏停太倉丞二員監事二員從之九年四月詔出太倉粟七十萬石開六場糶之并賑貸外縣百姓秋熟徵納便於外縣收貯以防水旱十二年四月詔出粟二十五萬石分兩街降估出糶其年九月詔諸道應遭水州府河南府澤潞河東幽州江陵府等管內及鄭清滄景易定陳許晉隰蘓襄復台越唐隨鄧等州人戶宜令本州厚加優卹仍各以當

處義倉斛斗據所損多少量事賑給訖具數聞奏其人戶中有漂溺致死者仍委所在收瘞其屋宇摧倒亦委長吏量事勸課修葺使得安存

十三年正月戶部侍郎孟簡奏天下州府常平義倉等斛斗請準舊例減估出糶但以石數奏申有司更不收管內州縣得專達以利百姓從之

長慶二年十月詔江淮諸州旱損頗多所在米價不免踊貴委淮南浙西浙東宣歙江西福建等道觀察使各

於本道有水旱處取常平義倉斛斗據時估減半價出
糴以惠貧民四年二月勅出太倉陳米三十萬石於兩
街出糴其年三月制曰義倉之制其來日久近歲所在
盜用沒入致使小有水旱生人坐委溝壑永言其弊職
此之由宜令諸州錄事參軍專主勾當苟為長吏迫制
許驛表上聞考滿之日戶部差官交割如無欠負與減
一選如欠者少者量加一選欠數過多戶部奏聞節級
科處

太和四年八月勅今年秋稼似熟宜於關內七州府及鳳翔府和糴一百萬石開成元年八月戶部奏應諸州府所置常平義倉伏請起今後通公私畝田別納粟一升逐年添置義倉斂之至輕事必通濟歲月稍久自致充盈縱逢水旱之灾永絕流亡之慮勅從之其年十一月忠武軍節度使杜悰邠寧軍節度使王源奏請當道常平義倉斛斗除元額外別置十萬石以備凶年從之大中六年戶部奏諸州府收管常平倉斛斗本防水旱

賑卹貧乏其有災沴州府地遠申報往復已至流亡今
後如有灾荒水旱外請委所在長吏差清强官勘審如
實便任開倉先從貧下戶濟給貸訖具數分析申奏并
報戶部不得妄有給與富豪人戶其斛斛仍仰本州錄
事參軍至當年秋熟專勾當據數追收如州府妄有給
使其錄事參軍本判官請重加殿罰長吏具名申奏勅
旨宜依其年十一月勅應畿內諸縣百姓軍戶合送納
諸倉及諸使兩稅送納斛斛舊例每斗函頭耗物折除

皆有數限訪聞近日諸倉所由分外邀額利索耗物致使京畿諸縣轉更凋弊農桑無利職此之由自今以來祇令依官額餘並禁斷

雜錄

長安元年十一月十三日勅負債出舉不得迴利作本并法外生利仍令州縣嚴加禁斷

開元十五年七月二十七日勅應天下諸州縣官寄附部人興易及部內放債等並宜禁斷

十六年二月十六日詔比來公私舉放取利頗深有損
貧下事須釐革自今已後天下舉放祇宜四分收利官
本五分取利

二十年九月二十九日勅綾羅絹布雜貨等交易皆合
通用如聞市肆必須見錢深非通理自今後與錢貨兼
用違者準法罪之

元和五年十一月勅應中外官有子弟凶惡出告家長
私舉公私錢無尊長同署文契者其舉錢主并保人各

決二十仍均攤貨納應諸色買賣相當後勒買人面付賣人價錢如違牙人重杖二十京兆尹王播所奏也

寶歷元年正月七日勅節文應京城內有私債經十年已上曾出利過本兩倍本部主及元保人死亡並無家產者宜令臺府勿為徵理

唐會要卷八十八

欽定四庫全書

唐會要卷八十九

宋 王溥 撰

疏鑿利人

武德元年長孫操除陝東道行臺金部郎中遂自陝東引水入城以代井汲百姓賴之 七年四月九日同州治中雲得臣開渠自龍門引黃河溉田六千餘頃

貞觀十一年揚州大都督府長史李襲譽以江都俗

好商賈不事農業譽乃引雷陂水又築句城塘溉田八百餘頃百姓獲其利

大厯四年五月十五日勅注堰監先廢宜令却置十二年京兆尹黎幹開決鄭白二水支渠及稻田磴碾復奏浚水道以就陸田

建中三年四月宰相楊炎不習邊事請于豐州置屯田發關輔人開陵陽渠人頗苦之京兆尹嚴郢嘗從事朔方曉其利害乃具五城舊屯及兵募倉儲等數奏曰按

舊屯沃饒之地今十不畊一若力可墾闢不俟浚渠其
諸屯水利可種之田甚廣蓋功力不及因致荒廢今若
發兩京關輔人于豐州浚渠營田徒擾兆庶必無其利臣
不敢遠引他事請以內園植稻明之且秦地膏腴田稱
第一其內園丁皆京兆人于當處營田月一替其易可
見然每人月給錢八千糧食在外內園丁猶僦募不給奏
令府司集事計一丁一歲當錢九百六十米七斛二斗
計所僦丁三百每歲合給錢二萬八千八百貫米二千

一百六十斛不知歲終收穫幾何臣計所得不補所費
況二千餘里發人出屯田一歲方替其糧穀從太原轉
餉糟運價值至多又每人須給錢六百三十米七斛二
斛私出資費數又倍之據其所收必不登本而關輔之
人不免流散是虛擾畿甸而無益軍儲與天寶以前屯
田事殊臣至愚不敢不熟計惟當省察疏奏不報郅又
上奏曰伏以五城舊屯之數至廣臣前揭名聞奏訖其
五城軍士若以今日所運開渠之糧貸諸城官田至冬

輸之又以所送開渠功直布帛先給田者至冬令據時估輸穀如此即闕輔免于徵發五城豐厚力農闢田比之浚渠十倍利也郢奏不省卒開陵陽渠而竟棄之

貞元四年六月二十六日涇陽縣三白渠限口京兆尹鄭叔則奏六縣分水之處實為要害請準諸堰例置監及丁夫守之奉勅旨依八年三月嗣曹王臯為荆南節度使觀察先是江陵東北七十里廢田旁漢右堤壤決凡二處每夏則為浸溢臯至命塞之廣良田五千頃畝

收一種又規江南廢洲為廬舍架江為二橋流人自占者二千餘戶自荆至樂鄉凡二百餘里旅舍鄉聚凡千數大者皆數百家楚俗佻薄舊不鑿井悉飲陂澤乃令合錢鑿井人以為便十三年七月詔曰昆明池俯近都城蒲魚所產宜令京兆尹韓臯充使修堰十六年十一月以東渭橋納給使徐班兼白渠漕渠及昇原城國等渠堰使元和八年孟簡為常州刺史開漕右孟瀆長四十里得沃壤四十餘頃觀察使舉其課遂就賜金紫焉

其年四月以神策軍士修城南灰渠其年十二月魏博觀察使田弘正奏準詔開衛州黎陽縣古黃河道從鄭滑節度使薛平之請也先是滑州多水灾其城西去黃河二里每夏漲溢則浸壞城郭水及羊馬之半平詢諸將吏得古河道于衛州黎陽縣界遣從事裴弘泰以水患告于弘正請開古河用分水力弘正遂與平皆上聞詔許之乃于鄭滑兩郡役徒萬人鑿古河南北長十四里東西闊六十步深二丈七尺決舊河以注新河遂無

水患詔並褒美焉

十三年湖州刺史于頔復城縣方山之西湖西湖南朝
䟽鑿溉田三千頃歲久堙廢至是復之秔稻捕魚之利
賴以濟

長慶二年溫造為朗州刺史奏開復鄉渠九十七里溉
田二千頃郡人利之名為右史渠至太和五年七月造
復為河陽節度使奏浚懷州方渠枋口堰役工四萬溉
濟源河內溫武陟舊縣田五千頃

四年七月詔疏靈州時逐渠置營田六百頃

大歷二年二月以昭應令劉仁師充修渠堰副使初仁師為高陵令上言鄭白渠可利者遠而涇陽獨有之條理上聞其弊遂革關中大賴焉其年三月內出水車樣令京兆府造水車散給沿鄭白渠百姓以溉水田

磴碾

開元九年正月京兆少尹李元紘奏疏三輔諸渠王公之家沿渠立磴以害水功一切毀之百姓大獲其利至

廣德二年三月戶部侍郎李栖筠奏請刑部侍郎王翊
充京兆少尹翊奏拆京城北白渠上王公寺觀碾磑七
十餘所廣水田之利計歲收粳稻三百萬石

大歷十三年正月四日勅白渠下碾有妨廢合拆總四
十四所自今已後如更置者即宜錄奏其年正月壞京
畿白渠八十餘所先是黎幹奏以鄭白支渠磑碾壅隔
水利人不得溉灌請皆毀廢從之時昇平公主上之愛
女有磑兩輪乞留上曰吾為蒼生爾識吾意可為衆先

遂即日毀之

元和六年正月京城諸僧有以請莊磴免稅者宰臣李吉甫奏曰錢米所徵素有定額寬緇徒有餘之力配貧下無告之氓必不可許從之八年十二月勅應賜王公郡主并諸色莊宅碾磴等並任典貼貨賣其率稅夫役委府縣收管

泉貨

武德四年七月十日廢五銖錢行開元通寶錢徑八分

重二銖四綮十文重一兩一千文重六斤四兩以輕重
大小最為折衷遠近甚便之其錢文給事中歐陽詢製
詞及書時稱其功其字含八分及篆隸二體其詞先上
後下次右後左讀之自上及左迴環讀之其義亦通流俗謂
之開通元寶錢鄭虔會粹云詢初進螭模因文德皇后
捻一甲跡故錢上有捻文十八日置錢監于洛并幽益
等諸州秦王齊王賜三鑪鑄錢裴寂賜一鑪敢有盜鑄
者身死家口籍沒至五年三月二十四日桂州置錢監

顯慶五年九月以天下惡錢多令為市取五惡錢酬一
好錢至十月以好錢一文博惡錢兩文至儀鳳四年四
月以天下惡錢多甚令東都出遠年糙米及粟就市糶
斗別納惡錢百文其惡錢令少府司農相知即令擣破
其重合斤兩者任將行用至先天元年九月二十七日
京中用錢惡貨物踴貴諫議大夫楊虛受上疏曰伏見
市井用錢不勝濫惡有加鐵錫即非公鑄虧損正道惑
亂平人銅錫亂雜偽錢豐多正刑漸失于科條明罰未

加于守長帝京三市人雜五方淫巧競馳侈偽成俗至于商賈積滯富豪擁錙兼并之人歲增儲蓄貧素之士日有空虛公錢未益于時須禁法當求其大要其惡錢臣望官為傳取納鑄錢州京城並以好錢為用書奏付中書門下議詳以為擾政不行至開元六年正月十八日勅禁斷惡錢行三銖四分已上舊錢更收人間惡錢鎔破復鑄準樣式錢勅禁出之後百姓喧然物價騰起商人不敢交易宰相宋璟蘇頌奏請出太府錢萬貫分

于南北兩京平價買百姓間所賣之物堪貯庫官須者
庶得好錢散行人間從之又降勅近斷惡錢恐人少錢
行用其兩京文武官夏季平定物價宜即先給錢待後
季任取所配物貨賣準數還官

七年二月詔天下惡錢並令禁斷禁令初下或恐艱辛
宜量出米十萬石令府縣太府寺選交易穩便處所分
置依時價糶與百姓收取惡錢便送少府監槌碎

乾封元年五月二十三日盜鑄轉多遂改鑄新文曰乾

封泉寶徑寸重二銖六分其開元通寶之舊錢並行用
其新錢一文當舊錢之十周年之後舊錢並廢其後寤
錢文之誤米帛增價乃議却用舊錢至二年正月二十
九日詔比以偽濫斯起所以採乾封之號改鑄新錢靜
而思之將為未可高祖撥亂反正爰創軌模太宗立極
承天無所改作今廢舊造新恐乖先旨其開元泉貨宜
依舊施行為萬代法乾封新鑄錢令所司貯納更不須
鑄仍令天下置鑪之處並鑄開元通寶錢至乾元元年

七月十六日詔錢貨之興其來久矣代有沿革時為重輕故周興九府實啓流泉之利漢造五銖亦弘改鑄之法必令小大兼適母子相權事有益于公私理宜循于通變御史中丞第五琦奏請改錢以一當十別為新鑄不廢舊錢異實三官之資用收十倍之利所為于人不擾從古有經宜聽其請別鑄一當十錢其文曰乾元重寶琦又請鑄重輪錢一當五十以二十斤成貫仍令鑄錢使即勾當起鑄至三年十三日詔項屬權臣變法非

良遂使貨物相沿穀帛騰踴求之輿議弊實由斯今欲
仍從舊貫漸罷新錢又慮權行轉實艱急如或猶循所
務永塞其源實恐物價虛騰黎人失業靜言體要用藉
良圖宜令文武百官九品以上並于尚書省集議委中
書門下詳議聞奏至上元元年六月七日詔其重輪五
十價錢宜減作三十文用其開元舊錢宜一錢十文行
用乾元十當錢宜依前行用仍令京中及畿縣依此處
分諸州待候進止至七月二十五日勅曰重稜五十價

錢先令畿外減三十價行其天下諸州並宜準此至十
二月二十九日詔應典貼莊宅店鋪田地碾磑等先為
實錢與貼者令還以實錢贖先少虛錢與貼者令少虛
錢贖其餘交關並依前用十當錢由是錢有虛實之稱
至寶應元年五月十九日赦文應開元乾元重稜錢並宜準
一文用不須計以虛數

開元二十二年三月二十一日勅布帛不可以尺寸為交
易菽粟不可以杪忽貨有無古之立制以通貨幣豈無

變通往者漢文之時已有放鑄之令雖見非于賈誼亦無廢于賢君況古往今來時異事反且欲不禁私鑄其理如何公卿百僚詳議可否秘書監崔沔議曰夫國之有錢時所通用若許私鑄人必競為各徇所求小如有利漸忘本業國計斯貧是以賈生之陳七福規于更漢令太公之創九府將以貧殷人況依法則不成違法則有利謹按漢書文帝雖降盜鑄錢令而不得雜以鉛錢為他巧者然則雖許私鑄不容奸錢鑄者無利則私鑄

自息斯則除之與不除為法正等能謹於法而節其用
令行而詐不起事變而奸不生斯所以稱賢君也今
若聽其私鑄嚴斷惡錢官必得人人皆知禁誠則漢
政可侔猶恐未若皇唐之舊也今若稅銅折役則官治
可成計估度庸則私錢無利易而可久簡而難誣謹守
舊章無越制度且夫錢之為物貴以通貨利不在多何
待私鑄然後足用也左監門錄事參軍劉秩議曰古者
以珠玉為上幣黃金為中幣刀布為下幣管子曰夫三

幣握之則非有補于煖也捨之則非有損于飽也先王以守財物以御人事而平天下也是以命之曰衡衡者使物一高一下不得有常故與之在君奪之在君富之在君貧之在君是以人戴君如日月親君如父母用此術也是謂人主之權今之錢即古之下幣也陛下若捨之任人則上無以御下下無以事上其不可一也夫物賤則傷農錢輕則傷賈故善為國者觀物之貴賤錢之輕重夫物重則錢輕錢輕由乎物多多則作法收之使

少則重重則作法布之使輕輕重之本必由乎是奈何而假于人其不可二也夫鑄錢不雜以鉛錫則無利雜以鉛錫則惡惡不重禁之不足以懲息且方今塞其私鑄之路人猶冒死以犯之況赦其源而欲人之從令乎是設陷穽而誘之入其不可三也夫許人鑄錢無利則人不鑄有利則人去南畝者衆去南畝者衆則草萊不墾艸菜不墾又隣于寒餒其不可四也夫人富溢則不可以賞勸貧餒則不可以威禁故法令不行人之不理皆由

貧富之不齊也若許其鑄錢則貧者必不能為臣恐貧者彌貧而服役于富室富室乘之則益恣昔漢文之時吳濞諸侯也富埒天子鄧通大夫也財侔王者此皆鑄錢之所致也必欲許其私鑄是與人利權而捨其柄其不可五也陛下必以錢重而傷本工費而利寡則臣願言其失以效愚計夫錢重者由人日滋于前而爐不加于舊又公錢重與銅之價頗等故盜鑄者破重為輕錢禁寬則行禁嚴則止止則棄矣此錢之所以少也夫鑄

錢用不贍者在乎銅貴銅貴之由在于採用者衆夫銅
以為兵則不如鐵以為器則不如漆禁之無害陛下
何不禁于人禁于人則銅無所用銅無所用則銅益賤
賤則錢之用給矣夫銅不布下則盜鑄者無因而鑄無
因而鑄則公錢不破公錢不破則人不犯死刑錢又日
增農末均利是一舉而四善也伏惟陛下熟察之其年
十月六日勅貨物兼通將以利用而布帛為本錢刀是
末賤本貴末為弊則深富教之間宜有變革自今以後所

有莊宅口馬交易並先用絹布綾羅絲緯等其餘市價至一千以上亦令錢物兼用違者科罪二十六年于宣潤等州置錢監

乾元元年七月戶部侍郎第五琦以國用未足幣重貨輕乃先鑄乾元重寶錢以一當十用及作相請更鑄重輪乾元錢以當五十與乾元錢開元通寶錢三品並行既而物價騰貴餓逃死亡枕藉道路又盜鑄爭起中外皆以為琦變法之弊封聞奏日遂貶忠州長史

四年六月判度支侍郎趙贊以常賦不足用乃請採鄆州白銅鑄大錢以一當十權其輕重

建元元年九月戶部侍郎韓洄上言江淮錢監歲出錢四萬五十貫輸于京師度工用轉送之費每貫計錢二千是本反倍利也今商州紅崖冶出銅益多又有洛源監久廢不理請增工鑿山以取銅與洛源故監鑄錢以歲計出錢七萬二十貫度用轉送之費計錢九百則利浮本矣其江淮七監請皆停罷從之二月八日諸道鹽鐵

使包倍奏江淮百姓近日市肆交易錢文益粗惡博擇
納官者三分終有二分饒並鉛錫銅盪不敷斤兩致使
絹價騰貴惡錢並漸多訪聞諸州山野地窖皆有私錢
轉相貨易奸隘漸深今委本道觀察使明立賞罰切加
禁斷

貞元九年正月張滂奏諸州府公私諸司邑鑄造銅器
雜物等伏以國家錢少損失多門興販之徒潛將鋪錢
一千為銅六斤造寫雜用器物則斤直六百餘有利饒

後銷鑄遂多江淮之間錢實減耗伏請準從前勅文除鑄鏡外一切禁斷

十年六月勅今後天下鑄造買賣銅器並不須禁止其器物約每斤價直不得過一百六十文委所在長吏及巡院同勾當訪察如有銷鑄為銅以盜鑄錢論罪

十四年十二月鹽鐵使李選奏請諸道州府多以近日泉貨數少繒帛價輕禁止見錢不令出界致使課利有缺商賈不通諸指揮見錢其直往來勿使禁止從之

元和元年二月禁私錢三年二月詔曰錢貴物賤傷農
害工權其輕重須有通變比銅鉛無禁鼓鑄有妨其江
淮諸州府收市銅鉛等先已令諸道知院官勾當緣令
初出未各頒下宜委諸道觀察使等與知院官嚴切勾
當事畢日仍委鹽鐵使據所得數會聞奏其年四月禁
鉛錫錢三年五月鹽鐵使李選上言得湖南院中郴州
平陽高亭兩縣界有平陽冶及馬跡曲水等古銅坑納
二百八十餘井差官檢覆寔有銅錫今請郴州舊桂陽

監置兩爐採銅鑄錢每日約二十貫計一年鑄成七千貫有益于人從之其年六月詔曰錢貨之法義在通流若錢有所壅貨當益賤故藏錢者得乘人之急居貨者必損已之資今欲著錢令以出滯藏加鼓鑄以資流布使商賈知禁農桑獲安義切救時情非欲利若革之無漸恐人或相驚應天下商賈先畜見錢者委所在長吏令收市貨物官中不得輒有程限逼迫商人任其貨易以求便利計周歲之後此法通行朕當別立新規設蓄

錢之禁所以先有告示許其方圓意在佗時行法不貸
又天下有銀之山必有銅鑛銅者可資於鼓鑄銀者無
益于民人權其重輕使務專一天下自五嶺以北見採
銀坑並宜禁斷恐所在坑戶不免失業各委本州府長
吏課勸令其採銅助官中鑄作仍委鹽鐵使條疏聞奏
四年閏三月勅京城時用錢每貫頭除二十文陌內
欠錢及有鉛錫錢等 貞元九年三月二十六日勅陌內
欠錢法當禁斷慮因捉搦或亦生奸使人易從切于不

擾自今以後有因交關用欠陌錢者宜但令本行頭及
居停主人牙人等檢察送官如有容隱兼許賣物領錢
人糾告其行頭主人牙人重加科罪府縣所由祇承人等
並不須干擾若非因買賣自將于街衢行者一切勿問
其年六月勅嶺已北所有銀坑依前任百姓開採禁
見錢出嶺 六年二月制公私交易十貫錢已上即須
監用足段委度支鹽鐵使及京兆尹即具作分數條疏
聞奏茶商等公私使換見錢並須禁斷 其年三月河

東節度使王鐸奏請于當管蔚州界加置爐鑄銅錢廢
管內銅器詔許之仍令加至五爐

七年五月兵部尚書判戶部事王紹戶部侍郎判度支
盧坦鹽鐵使王播等奏伏以京都時用多重見錢官中
支計近日殊少蓋緣比來不許商人使換因茲家有滯
藏所以物價轉高錢多不出臣等今商量伏請許令商
人于戶部度支鹽鐵三司任便換見錢一切依舊禁約
伏以比來諸司諸使等或有便商人錢多留城中逐時

收貯積藏私室無復流通伏請自今以後嚴加禁約從之八年四月勅以錢重貨輕出內庫五十萬貫令兩市收市布帛每端足估加十之一十一年九月勅今後應内外支用錢宜每貫除墊一百外量抽五十文仍委本道本司本使據數逐季收計其諸道錢便差綱部送度支收管以脩軍須時以淮西用兵從有司之請也

十二年正月勅泉貨之設故有常規將使重輕得宜是

資斂散有節必通其變以利于人今緡帛轉賤公私俱
弊宜出見錢五十萬貫令京兆府揀擇要便處開場依
市價交易選清强官吏切加勾當仍各委本司先作處
置條件聞奏必使事堪經久法可通行又勅近日布帛
轉輕見錢漸少皆緣所在壅塞不得流通宜令京城內
自文武寮不問品秩高下并公郡縣主中使等下至士
庶商旅寺觀坊市所有私貯見錢並不得過五千貫
如有過此許從勅出後限一月內任將市別物收贖如

錢數校多處置未了其任便于限內于地界州縣陳狀更請限縱有此色亦不得過兩月若一家內必有宅舍店鋪等所貯錢並須計同此數其兄弟本來異居曾經分拆者不在此限如限滿後有違犯者白身人等宜付所司決痛杖一頓處死其文武官及王公並委府司聞奏當重糾貶戚屬中使亦具名銜聞奏其見貯錢不限多少並勒納官數內五分取一分充賞錢止于五千貫此外察獲及有人論告亦重科處分并量給告者時京師里閭

區肆所積多方鎮錢如王鶚韓弘李惟簡少者不下五十萬貫于是競買第屋以變其錢多者聽里巷傭僦以歸其直而高貲大賈者多依倚左右軍官錢為名府縣不得窮檢法竟不行

十四年六月勅應屬諸軍使有犯時用錢每貫除二十文足陌內欠錢及有鉛錫銅者宜令京兆府枷項收禁牒報本軍本使府司差人就軍及看決二十如情狀難容復有違拒者仍令府司聞奏

十五年八月中書門下奏伏準庫官所議鑄錢或請收市人間銅物令州縣鑄錢當開元以前未置鹽鐵使亦令州郡勾當鑄造令若兩稅納足段或慮兼要通用見錢欲令諸道公私銅器各納所在節度團練防禦經略使據元勅給與價直並折兩稅仍令本處軍人鑄鑄其鑄本請以留州使年夫未用物充所鑄錢便充軍府州縣公用當處軍人自有糧賜亦校省本所資衆力并收衆銅天下併功速濟時用待一年後鑄器物盡則停

其州府有出銅鉛可以開爐鑄處具申有司便令同諸鹽冶例每年與本充鑄其收市銅器期限並禁鑄造買賣銅物等待議定便令有司條疏聞奏其工部鑄錢及收銅器續處分將欲頒行尚資周慮請令中書門下兩省御史臺并諸司長官商量重議聞奏從之

寶曆元年八月勅令銷鑄見錢為佛像者同盜鑄錢論長慶元年九月勅泉貨之義所貴流通如聞比來用錢所在除陌不一與其禁人之必犯未若從俗之所宜交

易往來務令可守其外內公外給用錢從今以後宜每貫一例除墊八十以九百二十文成貫不得更有加除及陌內欠少

太和三年六月中書門下奏準元和四年閏三月勅應有鉛錫錢並合納官如有人紕得一錢賞百錢者當時勅條貴在峻切今詳事實必不可行祇如造一錢賞百錢則有告一百貫錫錢須賞一萬貫銅錢執此而行是無畔際昨因任清等犯罪施行不得遂叅酌事

理量為給賞或恐已後更有犯者宜立節文令可遵守
臣等商量自今已後有用鉛錫錢交易者一貫以下以
州府常行杖決脊杖二十十貫以下決六十徒三年過
十貫以上所在集衆決殺其受鉛錫錢交易者亦準此
處分其所用鉛錫錢仍納官其能糾告者每貫賞錢五
千文不滿一貫準此例累賞止于三百千仍取其官錢
給付其所犯人罪不至死者仍徵家資充填賞錢其元
和四年閏二月勅便望刪去勅旨依奏四年十一月勅

應私鑄見錢家除合貯數外一萬貫至十萬貫限一周
年內處置畢十萬至二十萬貫以下者限二周年內處
置畢如有不守期限安然蓄積過本限即任人糾告及
所由覺察其所犯家錢並準元和十二年勅納官據數
五分取一分充賞糾告人賞錢數止于五千貫應犯錢
法人色目決斷科取準元和十二年勅處分其所由覺
察亦量賞一半事竟不行 五年二月鹽鐵使奏湖南管内
諸州百姓私鑄告到錢伏緣衡道數州連接嶺南山洞

深邃百姓依模監司錢樣競鑄成脆惡奸錢轉將賤價博易與好錢相和行用其江西鄂岳桂管嶺南等道應有出銅錫之處亦慮私鑄監錢並請委本道觀察使條疏禁絕勅旨宜依

會昌六年二月勅緣諸道鼓鑄佛像鐘磬等新錢已有次第須令舊錢流布絹價稍增文武百寮俸料宜起三月一日並給見錢其一半先給虛估足段對估價支給勅比緣錢重弊輕因令加鼓鑄必在流行通變救時莫切

于此宜申先甲之令以戒居貨之徒京城及諸道起今年十月已後公私行用並取新錢其舊錢權停三數年如有違犯同用鉛錫惡錢例科斷其舊錢並納官事竟不行

天佑二年四月勅準向來事例每貫抽除外以八百五文為貫每陌八十五文如聞坊市之中多以八十為陌更有除折今後委河南府指揮市肆交易並須以八十五文為陌不得更改移

唐會要卷八十九

欽定四庫全書

唐會要卷九十

宋 王溥 撰

閉糶

開元二年閏二月十八日勅年歲不稔有無須通所在州縣不得閉糶各令當處長吏檢校

上元元年九月勅先緣諸道閉糶頻有處分如聞所在米粟尚未流通宜令諸節度觀察使各將管內捉搦不

得輒令閉糴

大厯十一年六月十三日勅自今已後所在一切不得閉糴及隔絕推稅貞元九年正月詔諸州府不得輒有閉糴

太和三年九月勅河南河北諸道頻年水患重以兵役農耕多廢粒食未豐比令使臣分路賑恤冀其有濟得接秋成今諸道穀尚未減賤而徐泗管内又遭水潦如聞江淮諸郡所在豐稔穀因甚賤以致傷農州縣長吏

苟思自便潛設條約不令出界雖無明榜以避詔條但商旅不通米價異致今水旱之處種植兼資宜令御史臺揀擇御史一人于河南巡察使每道每州界首物價不等米商不行即是潛有約勒不必更待文榜為驗便具事狀及本界刺史縣令觀察判官名銜聞奏河南通商之後淮南諸郡米價漸起輾轉連接之處直至江西湖南荆襄以來並須約勒依此舉勘聞奏仍各委觀察使審詳前後勅降與御史相知切加訪察不得容蔽咸

通七年十月二十三日御史臺奏今後如有所在聞閉
糴者長吏必加貶降及判官錄事叅軍並停見任書下
考仍令州縣各以版榜寫錄此條懸知百姓每道委觀
察判官每州委錄事叅軍勾當逐月具不閉糴事由申
臺從之

和糴

證聖元年三月二十一日勅州縣軍司府官等不得輒
取和糴物亦不得遣人替名代取

興元元年閏十月詔江淮之間連歲豐稔迫于供賦頗亦傷農收其有餘濟彼不足宜令度支于淮南浙東西道加價和糴三五十萬石差官般運于諸處減價出糴貴從權便以利于人

貞元二年九月度支奏京兆河南河中同華陝虢晉絳鄜坊丹延等州府夏秋糧稅青苗等錢物悉折糴麥所在儲積以脩軍食京兆府兼給錢收糴每計于時估外更加錢納于太倉詔可之其年十一月度支給添成四

千萬貫令京兆府今年內收糴粟麥五十萬石以脩軍食詔從之四年八月詔京兆府于時價外加估和糴差清強官先給價直然後貯納續令所司自般運載太倉并差御史分路訪察有違勅文令長以下當重科貶先是京畿和糴多被折配或物估輕于時價或先輸而後給直追集停攤百姓苦之及聞是詔莫不歡忭樂輸焉元和七年七月戶部侍郎判度支盧坦奏今冬諸州和糴貯粟澤潞四十萬石鄭滑易定各一十五萬石夏州

八萬石河陽一十萬石太原二十萬石以今秋豐稔必資畜脩其澤潞易定鄭滑請委本道差判官和糴各于時價每斗加十文所冀人知勸農國有常脩從之

長慶元年二月勅春農方興種殖是切其京北京西糴使宜勒停先是度支以邊儲無脩請置和糴使經年無効徒擾邊人故罷之四年八月詔于關內及關外折糴和糴一百五十萬石用脩饑歉其和糴價以戶部錢充收貯尋常不得支用

寶歷元年八月勅以兩京河西大稔委度支和糴二萬斛以脩災沴

大中六年五月勅自收關隴便討党項邊上生人皆失活業連屬艱食遂不寧居兼軍儲未得豐殷切在多方贍助今年京畿及西北邊稍似時熟即京畿人家竟搬運斛斛入城收為蓄積致使邊塞粟麥依前踊貴兼聞省司和糴亦頗艱難其弊至深須有釐革其京西北今年夏秋斛斛一切禁斷不得令入京畿之界

其年六月勅近斷京北夏秋斛斛入京如聞百姓多端以麥造麪入城貨易所費亦多切宜所在嚴加覺察不得容許

食實封數

舊例凡有功之臣賜實封者皆以課戶先準戶數州縣與國官邑官執帳供其租調各準配租調遠近州縣官司收其腳直然後國邑官司其數準此入國邑者收其庸

安國相王太平公主各一萬戶神龍元年十一月六日
勅安樂公主四千戶長寧公主三千五百戶神龍元年
十二月二日勅

衛王溫王各二千五百戶同上月勅

寧王憲薛王業慶王潭忠王亨棣王洽鄂王清各二千
戶開元二十一年四月一日勅

榮王琬已下各三千戶開元二十三年七月二十三日

勅

楚王豫一千戶至德二年十二月十五日勅

雍王适二千戶寶應二年七月十一日勅

郭子儀二千戶大歷十四年閏五月十五日勅

渾瑊一千八百戶檢年月未獲

裴寂一千五百戶貞觀二十三年九月八日勅

荆王元二千五百戶武德九年十月八日勅

武三思一千五百戶神龍元年正月五日勅

李光弼一千五百戶寶德二年七月十一日勅

僕固懷恩一千五百戶同上月日勅

長孫無忌王君廓尉遲敬德房玄齡杜如晦並武德九年十月八日勅至永徽元年十一月二十八日詔房玄齡所封不須依例減降

新都宜城定安公主各一千三百戶並神龍元年十月一日勅

長孫順德柴紹羅藝趙郡王孝恭各一千二百戶同上月日勅

王武俊一千二百戶檢勅未獲

劉弘基一千一百戶顯慶元年勅

李勣一千一百戶總章元年十二月勅

韓游瓌一千一百戶檢勅未獲

侯君集張公謹劉師立各一千戶武德九年十月八日
勅

武士彠一千戶顯慶四年七月勅

武攸暨一千戶神龍元年正月十八日勅

宣城公主一千戶神龍元年十二月二日勅

薛崇簡一千戶唐隆元年六月二十五日勅

邠王守禮一千戶唐隆元年七月四日勅

永穆公主一千戶開元十年勅

樂安王瑗開元二十四年七月十四日勅

高都公主已上各一千戶開元二十五年四月二十七

日勅

魚朝恩一千戶大歷五年三月勅

田承嗣一千户大厯八年二月三日勅

高士廉九百户段志玄九百户貞觀元年勅

魏徵九百户貞觀十七年正月勅

李晟李元諫各九百户檢勅未獲

李湛八百户神龍元年正月十八日勅

李輔國八百户寶應元年三月三日勅

宇文士及秦叔寶程知節各百户武德九年十月八日

勅

李多祚敬暉桓彥範張柬之崔元暉並七百戶神龍元年十二月二日勅

姜皎七百戶先天二年七月十八日勅

劉幽求七百戶先天二年八月十一日勅

馬燧七百戶唐朝臣五百五十戶檢勅未獲

安興貴安修仁唐儉寶軌屈突通蕭瑀封德彝劉義節各六百戶武德九年十月八日勅

溫嘉順六百戶檢勅未獲

魏元忠五百五十戶神龍元年十二月二日勅

李靖五百戶貞觀四年八月勅永徽二年十月九日詔

李靖所食封不須減

段秀實五百戶李抱真五百戶興元元年二月勅

陳仙奇五百戶貞元二年四月勅以殺李希烈功也

李愬五百戶元和十二年十一月勅

劉悟五百戶元和十四年二月勅以殺李師道功也

田弘正三百戶張子良田少卿李奉仙各一百五十戶

元和二年十一月勅以擒李錡功也

史奉敬五十戶長慶元年二月勅以破吐蕃功也

緣封雜記

貞觀二十三年九月八日勅諸王並宜食一千戶封霍王元軌使國令徵封令請依諸國賦物貿易取利元軌曰汝為國令當正吾失反說吾以利耶

神龍二年四月十四日制功臣段志玄屈突通蕭瑀李靖秦叔寶長孫順德劉弘基宇文士及錢九隴程知節

龐卿博暉竇琮苑君璋李子和張平高張公謹梁恪仁
安脩奏行師獨孤卿雲蘇定方李安遠鄭仁泰杜君綽
李孟嘗等二十五家所食實封並依封給

其年十一月一日勅皇太子在藩府日所食衛府封物
每年便納東宮給事中盧燦駁奏曰伏以皇太子處繼
明之重當主鬯之尊歲時限用自可有司供擬又據周
禮諸司應財器歲終則會準王及太子不會此則儲蓄
之費咸與王同今與列國諸侯齊衡入封豈所謂憲章

古昔垂法將來者也上納其言十一月五日勅停

景龍二年九月勅諸色應食寔封一定已後不得輒有
移改

三年勅應食封邑者一百四十餘家應出封戶凡五十
四州皆天下膏腴物產其安樂太平公主封又取富戶
不在蠲免限百姓著封戶者甚于征行十一月監察御
史宋務光上疏曰臣聞分珪裂土各有方位通邑大都
不以封錫前猷未遠古義亦深自頃命侯莫居磽瘠專

擇雄奧徐州貢土方色已乖寢邱辭封讓德不嗣且滑
州者國之近甸密邇帝畿地出繭稅人多趨附所以列
縣惟七分封有五王賦少于侯租入家倍于輸國求諸
既往寔所未聞每科封丁有甚征戎因而失業莫返其
居此土風逃者舊少頃日波散良緣封多伏願稍減封
戶散配餘州下息疲屯上尊古制則公侯不失于采地
流蕩得還于故鄉諸州封戶亦望準此又徵封使者往
來相繼既勞傳驛甚擾公私請附租庸每年送納望停

封使以靜下人仍編入新格庶為永例又聞五等崇榮
百王盛典自非若邢茅近屬冠鄧鴻勲無以誓彼山河
酬其爵土近者封建頗緣恩澤功非橫草人已分茅遂
使輿壤名區多入侯國邑收家稅半于天府經費不足
蓋亦有由竊見武德之初建侯故事于時天寶新定王
業創開佐命如雲謀臣如雨然而封者不過十數人今
禮樂承平邦家綏定世家賢舊之裔無野戰攻城之勤
至于命封不合全廣論功謝于前葉食邑踰於往時既

減邊儲寔虧國用伏惟酌宗周之前訓咨武德之舊章
地匪宗盟勲殊社稷不宜加于食邑自可寵以虛名如
此則庶績其凝彝倫攸叙臣忝當庶問脩採風謠見此
不安豈敢自默知必被封家所疾願嘗以報國為心乞
擇愚言訪諸朝宰秋毫有益夕死無恨兵部尚書韋嗣
立上疏曰臣竊見食封之家其數甚衆昨聞戶部云用
六十餘萬丁一丁兩支計一百二十萬疋已上臣頃在
太府知每年庸調絹數多不過百萬少則七八十萬以

外比諸封家所入全少臣聞自古封茅土裂山河皆須
業著經綸功申草昧然後配宗廟之享承帶礪之恩往
者皇運之初功臣共定天下當時食封纔祇三二十家今以
恩澤受封至百十四家已上國家租賦大半私門私門
資用有餘國家支計不足有餘則是官典或是奴僕
多挾勢騁威凌突州縣凡是封戶不勝侵漁若戶必限
丁物送太府封家但于左藏請受不得輒自徵催則必
免侵漁人冀蘇息

唐隆元年六月十三日勅安國相王鎮國太平公主宜各食一州全封其州公主自簡

太極元年正月制皇太子妃王氏預聞秘策潛圖義舉父仁皎食實封三百戶

開元三年五月勅封家總合送入京其中有別勅許人就領者待州徵足然後一時分付徵未足者封家人不得輒領出封州亦不得因有舉放違者禁身聞奏

四年三月十八日宰臣奏對諸國請自始封至曾孫者

其封戶三分減一制可也

十年十一月勅中書門下宜共食實封三百戶自我禮
賢為百代法其年加永穆公主封一千戶初永穆等各
分五百戶左右以為太薄上曰百姓租賦者非吾有也
斯乃宗廟社稷蒼生是為爾邊隅戰士出萬死不顧一
生所賞賜纔不過一二十疋此輩何功于人頓食厚封
約之使知儉嗇不亦可乎左右以長公主皆二千戶請
與比上曰吾嘗讀後漢書見明帝曰朕子不敢望先帝子

車服皆下之吾未嘗不廢卷歎息汝柰何欲令此輩望長
公主乎左右不敢復言至是公主等車服始不給故加
焉令自後公主皆封一千戶遂成常例至乾元元年三
月一日諸公主宜各給五百戶郡主縣主據元賜戶數
三分各給二分並以宣越明衢婺等州給之

其年五月十日勅諸食實封並以給戶為限不須一分
入官其物仍令出封州隨庸調送入京其脚以租腳錢
充並於太府寺納然後準給封家其年九月十二日勅

親王公主等封物宜隨官庸調隨駕所在送至京都賜坊令封家就坊請受餘食封家不在此限仍令御史一人及太府寺官檢校分付使給了牒

二十二年九月勅諸王公以下食封薨子孫應承襲者除表後十分減二仍具所食戶數奏聞無後者百日後除諸名山大川及畿內縣並不封

天寶六載三月六日戶部奏諸道請食封人準長行二百三百戶以下戶部給符就郡請受三百戶已上附庸

使送兩京太府寺賜坊給付者今緣就州請受有損于人今三百戶以下尚許彼請公私之間未免侵擾望一切送至兩京就此給付即公私省便侵擾無由矣又準戶部式節文諸食實封人身沒已後所得封物隨其男數為分承嫡者加一分至玄孫即不在分限其封總入承嫡房一依上為分者有如此則玄孫諸物比于嫡男計數之間多支數倍舉輕明重理寔未通望請至玄孫已下準玄孫直下一房許依令式餘並請停唯享祭一

分百代不易自然爭競永息勲庸無替

永泰二年正月十六日勅自今已後子孫襲實封宜減半永為恒式至三月十八日勅應請封家三分給二分待兵策稍寧即當全給

大歷十一年九月二十四日勅諸公主封物公主薨後三年不須停

興元元年正月勅諸軍諸道諸使應付奉天及進收京城將士等或百年摧敵或萬里勤王扞固金城驅除大

懃濟危難者其節著復社稷者其業榮我圖有功特加
彝典錫名疇賦永代無窮宜並賜名奉天定難功臣其
有食實封者子孫相繼代代不絕

貞元二年五月故尚父汾陽王子儀實封二千戶宜準
式減半餘以分襲曖可襲代國公通前襲三百戶晞可
襲二百五十戶曙可襲二百五十戶暎可襲二百二十五
戶

七年三月戶部奏伏以周漢故事有功即加地有罪即

奪國既明賞罰方申沮勸其犯除名以上罪有實封準法合除比來因循無不申降自今以後應實封人或人緣罪犯其堂省及本軍本使本貫奏狀請令並標食封戶數本配州名同奏勅下戶部以為憑據其犯徒罪三分望奪一分流罪奪一半除名以上罪即準法悉除並以本犯條論不在減贖之限其奉特勅貶謫稔制詞內所犯無正條者伏請準流罪奪一半勅旨依奏 其年十一月勅諸公至每年各給封物七百端足皆依舊例

春秋兩限支給諸郡主每季各賜錢一百貫文縣主每季賜錢七十貫文

八年八月戶部奏準貞元七年三月二十日勅節文比來食實封人多不依令式皆身沒之後子孫自申請傳襲伏請自今以後并今日以前應食實封人并一年內準式具合襲子孫官品年名并母氏嫡庶于本貫陳牒如無本貫即于食封人本任本使申牒如合襲人有罪疾及身死者亦限一周年內申牒請立以次合襲人仍

具家口陳牒請附籍帳本貫勘責當家及近親如寔是嫡長即與責保準式附貫然後申省到後即取文武職事三品正員一人充保勅旨依

二十一年七月六日勅應食實封其節度使宜令百戶給八百端疋若是絹兼給綿六百兩伏以實封本因賞功封之多少視功之厚薄不以官位散要別置等差其節度使兼宰相準貞元二十年以前舊例處分從之

元和四年六月戶部侍郎判度支李夷簡奏應給食實

封官自貞元十三年以後節度使宰相每百戶給八百
端疋若是絹更給綿六百兩節度使下兼宰相每百戶
給四百疋軍使及金吾諸衛將軍大將軍每百戶給二
百五十端疋

內外官祿

武德元年十二月隨制文武官給祿正一品七百石從
一品六百石正二品五百石從二品四百六十石正三
品四百石從三品三百六十石正四品三百石從四品

二百六十石正五品二百石從五品一百十石正六品
一百石從六品九十石正七品八十石從七品七十石
正八品六十石從八品五十石正九品四十石從九品
三十石並每年給

貞觀二年二月二十日詔官人得上考給一季祿至三
年正月十一日官得上下其年六月詔官人出使皆廩
其妻子至十二月詔外官新任多有匱乏準品計日給
糧

八年中書舍人高季輔上表曰仕以應務亦以代耕外
官卑品猶未得祿既離鄉井理必貧匱但妻子之戀賢
達其猶累懷饑寒之切夷惠罕全其行為政之道期于
易從若不恤其匱乏唯欲利其清儉凡在末品中庸者
多正恐巡察歲出輜軒繼軌不能肅其侵漁何以求其
政術今戶口漸殷廩倉已具斟量給祿使得養親然後
督以嚴科責其報效則庶官畢力物議斯允

永徽元年八月詔文武五品以上解官充待者宜準致

仕人例給半祿先宅元年十月二十日勅諸内外官祿料
賜會二事已上皆據上日給新授官未上所司及承勅
使差充使者祿料并考第一事已上並不在與限如別
勅應差使者京官以勅出日外官以勅符到日為上日
若新授外仍直諸司者上日同京官即舊人應替先別
勅定名充使未廻兩應給而無正課料者以當處官料
充職申據新人上日為斷不給別舊人因使應別給者
經一季雖未了不在給限其制勅授官雖勅符先到未

上者舊人無犯不在停限天寶二年十一月十六日勅
京官兼太守等官俸料兩給者宜停其外官太守兼京
官除準式親王帶京官外任官副大將軍副使知軍及
正事京官兼內外官知政事據文各兼給考餘並從一
處給任遂穩便 十四年八月勅在京文武九品已上
正員官既親于職務可謂勤上自今以後每月給俸食
雜用關防奴僕等宜十分為率加二分其官加一分仍
永為常式至德二年四月勅天下郡府及縣官祿侍直

品子等衛從今年正月一日已後並量給一半事平之後當續支還

貞元七年十二月勅郡主壻授檢校四品京官戶部每月給料錢三十貫文度支給祿粟一百二十石縣主壻檢校五品京官戶部每月給料錢一十貫文度支給祿米一百石

大中三年九月勅秦州刺史祿粟每月給五十一石原州威州刺史祿粟每月各給四十一石

唐會要卷九十